

Augsburg, 12. Oktober 1556

An Caspar von Niedbruck

ÖNB, Cod. 9737^k, fol. 137r.

<S.> P. D. Mirum est, Clariss[ime] vir, nostras literas, cum volucres sint, tam serò eò peruenire, quò cursum intendere debebant. Nam E. T. quoque epistolium Geislingae datum 3 Septembr[is] paulo ante Cal[endas] Octobris ad me peruenit. e quo singularem tuam erga me benevolentiam perspexi. Cum non in Zonara duntaxat summè necessarium officium mihi praestiteris: quem quidem ante 2 menses et amplius, Viennam perferendum cum meis literis mandaui, et factum esse iam per Fuggeranos scribas arbitror, nisi defuerit occasio. Sed etiam Constantinopolitanos libros communicare non recuses. Etsi autem vereor, ne ἀνθρακες ἡμῖν ὁ Θησαυρὸς (video enim pauca afferri nisi collectanea quaedam monachorum) tamen si quid forte reliquiarum vetustatis admisceretur, id non quidem mitti, sed indicari mihi vellem, vt pro herili bibliotheca conquirere liceret. Birckmannus noster negligentiss[imus] est. Toto iam anno neque librorum neque literarum ferè quicquam ad me misit. Sed si quid miserit, E. T. voluntati et hac in re et alijs omnibus, quae quidem penes me fuerint, morem libens geram. Vale vir Clariss[ime] et Wolfium, vt facis, commendatum habe. Augustae Vindelicorum. 4 Idus Octobris. 1556.

Ex. T.
obseruantiss[imus]
Hiero[nymus] Wolfius.

Zonarae mei 2 tomi iam vt arbitror sub Oporini praelo sunt. breui tertium quoque mittam. Absoluetur, vt spero, ad Cal[endas] Martias. Anni 1557. Vbi igitur prodierit

Iam positis nouus exuuijs nitidusqúe iuuenta,
dabo operam vt 2 exempla, alterum E. T.^{ae}, alterum Viennensi bibliothecae mittantur. Vester enim codex praeclare de nostro Zonara meritus est. quo nomine me beneficentiae tuae plurimum debere agnosco. Qui Gallicum indicem describat, nondum contigit. faciam ipse paulò factus ociosior. Res enim moram fert vt arbitror.